

Kolosedan Poolbed Kolosedan Yaa Kerek Wongke Keendoon

Kerek Kee Komo Dowad Wongkoon

Dudi kedmengkandi kuu Kolose aom meneboon kowe, Pool kuu kerek kee Rom yaambéd wongkoon. Dudi kedmengkandi kuu: 1. Awinaab, anaab, dedmonaab andi ye amowamowiib, 2. Engyus kuu ari Yesu arebban ande kedmengkandiyiib, 3. Biknoon ye weng kanduwen andiyiib, 4. Okad yiri ye meeni kangdomiib kui. Kowe, Poolbed weng anammo Kolosedan yaa kedmengkande wongkoon. Wongkoon ye weeb kuu AD 60 areb.

Korok Weng

1. Amun Kerundi Weng Ibduruk (1:1-2)
2. Kolosedan Yi Dowad Eso Ande Kurikuri Kami Ye Weng (1:3-14)
3. Keresu Kuu Korem Burudande Arimbed Anam (1:15-23)
4. Pool Anam Andiwendan Yi Dowad Deme Awinoon Ye Weng (1:24—2:7)
5. Nub Kuu Okad Yiri Ye Amowamob Yaa Kuu Keresumbed Dudboroone Obonmo Keruwen Ye Weng (2:8-23)
6. Karadmo Dobiri Kerekmen (3:1—4:6)
7. Yeenbon Kubendi Weng (4:7-18)

¹ Pool, ne kuu God ye dowaken yaambéd Yesu Keresumbed kinoona ye apaso keraan nub kuristen angkodmi Timoti yoom.

² Ma korondiyiibban Keresu yaa anam andimo doberembirimaib karadmodan Kolose aom doriib, yiib yaa kerek kee keenduub.

Kabamoon kondoon ye mimyob dowakeniib yewenubmo dobiriyiib kuu nuwambe God yaambad yiib yaa bangkandok.

Yi Kurikuri Anam Andiwendan Yi Dowad

³ Nub kuu yiib dowad nub Yariman Yesu Keresu ye Ambe God yaa kurikuri kerembirimaub kuu ye yaa eso andimaub, ⁴ amborom kuu Yesu Keresu yaa yiib anam andiyiib God ye karadmodan korem yaa yiib mimyob dowaken keendiyiib wengamburuwen kowe. ⁵ Anam anam ye weng, weng amun kui, kuu yiib yaa ibduruk monoon kuu Godbed Ewen arimbed komarewa kamaneen anam andidan yi dowad kuu yiib wengambiriwen. Kowe, yiib anam andiyiib mimyob dowakeniib kuu kuye weng yaambad demboon. Kuye weng kunduk kuu, yiib kuu anam kandanuub ande meedmiib kii.

⁶ Okad yimin yimin korem kuyaom kuu weng amun kee monoon areb kuu kwane yiib yaa monoon kii. Kwane, weng amun kee yiib kumaom kuu idiib irimaan, kwane kawiiib yeederebene kainderebimaan. Okad yimin yimin korem kuyaom kuu kwamunemo kamimaan. Kuku yiib kuu weng amun kee aron ibduruk arimbed wengamberenib, Godbed kabamoon kondoon ye mimyob dowaken ye weng id anam korem yiibkaadkeriwen. Kaadkeriwen kumbed mene ari kuu yiib kuyaom kwamune areb kamiimaan kui. ⁷ Yiib kuu nub deme mimo ye karub mimyob dowaken keenimaubman Epafras

yaambéd yíibkaadkeriwen. Ye kuu ma korondiyi-
ibban kumbéd Keresu ye deme awinimaan nub
dowad. ⁸ Kwane, ye kuu yíib mimyob dowaken
Kingkin Karadmo yaambéd keendimaib kuu nub
yaa daandoon.

⁹ Kwamune ye dowadbed ibduruk yíib dowad
wengamburuwen kumbéd mene ari kuu yíib
dowad womoniyíibban kurikuri kamimaub. God
yaa kaamonimaub kuu kingkin ye kerekmen ye
meeni kangdomiib kaadkeriyíib korem yaambéd
ye dowaken yaa yíibkaadkeri kuu yíib inamen
aom dembok anduwed. ¹⁰ Kwanikob, Yariman
Yesu yaningko kankooni ye kerekmen yaambéd
dobirime andi ye dowad kwane kurikuri ka-
muub. Yíib kuu kwane dobaraniib kuu yíib yaa
kubi darewoob kamendaneen. Kuye aningko
kankooni kiwaan yena kuu, deme amunmo ko-
rem awinaniib kumbéd yowiib iriyíib, God yaa
kaadkeri yaambéd kaine amniyíib, ¹¹⁻¹² anam
andi yaa erekmab anam ande doberembiri dare-
woowiib, yodbirimbán iwarimbed doberembiri
darewoowiib, kwamune bime andi ye dowad God
ye aromkono nambiriyíib, ye kerekmen yaambéd
aromkono korembéd aromniyíib, Ambe God yaa
kubimo eso andiyíib, kui. Kuye God kuu nambi-
rimo ye oonimbon aom ye karadmodan yi yum-
bon kuu yíiwíib íbmo dohiri dowad yíib yaa yim-
inmo kerundoon. ¹³ Ye kuu kumunmo ye oonim-
bon yirimbed nub ben yaro ye mimyob dowaken
keenoon ye Mingki ye oonimbon aom yuroon.
¹⁴ Kuye Mingki kuyaambéd nub kuu bíddoon,
kukuu nub ambarakmi kuu are nonondandoon
kui.

Yesu Keresu Kuu Kane?

¹⁵ Yesu kuu wedmeninideban ye God ye kuru korokboon, ye kuu wonob dana mingki areb, ongmenaboon ye kumkam korem kuu yirimo, yembedmo kuu ari. ¹⁶ Amborom kuu ye yaambéd kumkam korem kuu ongmenaboon kowe. Kumkam korem, Ewen ariyiib okad yiriyiib, wedmuuwiib wedmokbaniib, korok korok yi ooni yaromkono o aromkono maa maa ye yumbon o yarian yi yumbon o korok korok deme ye aromkono ye yumbon kwamune awene kui, korem kuu ye yaambéd ye dowad ongmenaboon.

¹⁷ Ye kuu yedin doboroonkob kumkam korem kuu ye yomanbed kwane dembe wonoon. Yi kuu ye yaambéd yiminmo doriib. ¹⁸ Kwane, anam andiwendan kuu ye id areb, ye kuu yi korok kui. Ye kuu bobnoon yirimbed ibduruk dembekore wonob dana keroon, kowe kumkam korem yaa yembedmo kuu ari. ¹⁹ Amborom kuu God ye kubi dowaken keroon kuu ye meeni koremiib inamen koremiib dowaken koremiib aromkono koremiib Yesu ye niindem aom angkeen kowe.

²⁰ Kwane, Yesu yaambéd God kuu yeka ye yaa kunum keru ye kiwaan ongmoon, okad yiriyiib Ewen ariyiib korem ongmenaboon yi dowad. Kiwaan ongmoon kuu bon dowan keru yeman, ye umkan at ming arimbed onduknoon yaambéd ongmoon.

²¹ Anukbed yiib kuu God yaa ambabbed doberenib God ye bondan keruwen, amborom kuu yiib meeniyiib kamiyiib kuu arewamo kowe. ²² Kumban kibikee yiib kuu God yaa kunum keruwen, Keresu ye id bobnoon yaambéd.

Kwanoon kuu yiid kuu karadmo ongmendoka ye murubia arimbed demkoronmoyiid yiid yaa ambarakmiwen kii ande dedmone daandiyiibbaniib dobirime anded. ²³ Kumban yiid anam andi kumbed doberembaraniib kuu kwamunemo keraniib kumbedmo. Yiid anam andi kuu yumburum ambab yiri kawenebe awingkanabemoon areb keriiwe, weng amun aombed Godbed kwananeen ande meedmi kuyaambed ben kimyen winindo kumbed kui. Kuye weng amun kuu yiid wengambiriwen, kwane weng amun kee okad yimin yimin yaa doriibdan yaa daandiwen, kwane weng amun keye deme karub keraan, ne Pool.

Pool Ye Deme Anam Andiwendan Yi Dowad

²⁴ Kwane, ne kuu yiid anam andiwen ye dowad yaambed durud yewediib kandaan kowe kubaan. Kwane, yimin kerindo ye durud yewed kuu ne id yaa yimin kere weneen, Keresu ye durud yewed ye kerekmen yaambed. Kukuu anam andiwendan yi dowad, yi kuu Keresu ye id kui. ²⁵ Godbed deme kawoone anam andiwendan yi dememan keraan kuu, yiid yaa God ye weng yiminmo korokbendok anded. ²⁶ Weng kee kurin kurin yirimbed yemyeb kanbiknoona angkimboroona awoya yi awoya ma wedmindo kumbed mene ari kumban, kibikee God ye karadmodan yaa korokbendoon. ²⁷ Id darewoob ye weng nam-biriyiid anukbed biknoon kee nub yaa monoon kuu, Godbed meeni ongmekore ambibkin koremdan kuyaom korokbendoon kuu Keresu kuu yiid niindem aom doreen. Ye yaambed God ye nam-biri aom dobaranuub andi ye meedmi yeman.

²⁸ Kwane, nub kuu Keresu ye dowad dakme korokbendimaub. Nub kuu meeni kangdom ko-rembed nimakarub korem yaa ongkandenub ked-mengkandimaub, nimakarub korem kuu Keresu yaambéd demkoronmo keribka God ye kerebiri ari benmene bangkanem andi ye dowad. ²⁹ Kuye dowad ye aromkono korem kawoon kumbed bamdaane ambangkemain. Kuye aromkono kuu ne yaambéd deme darewoob ambangkimaan.

2

¹ Ne dowaken yiiibkaadkerime andid, yiiwiib Laodiseadaniib ne ma wengawindodaniib yiiib korem ye dowad ninabe naawonmo ambangkemain. ² Ne kee kwamako, yiiib niindem aom aromne kubiyiib doberenib, kwane mimyob dowaken yaambéd kan mimo kerime. Kwananiib kuu God ye weng kanbiknoon kuyaa kaadkeri kumundinmo kere karekmiyiibban kere amun kerundi darewoob arimbed kandaniib. Kuye weng kanbiknoon kuu Keresu ye kui. ³ Ye aommo kuu meeni kangdom koremiib kaadkeri koremiib ye amun kerundi darewoob arimbed kuu bikdereboon. ⁴ Kee kwane yedmaan kuu yenambéd mene weng amun areb kumban id angkara kuu arewa kumbed ma nemengkande birandaib andi ye dowad. ⁵ Amborom kuu wuruk kuu ne kuu yiiwiib yaa dorokban kumban, ne mimyob aom kuu yiiib yoom doriin kowe. Kwane, yiiib konomdangmo nekdane dobiriyiib Keresu yaa anam andi kangdommoyiib wedme kubaan kii.

Yesu Keresu Yaamo Kwane Doberembiri

⁶ Kwani kowe, yiib kuu Yesu Keresu nende yiib Yariman keriwene kwamune areb kuu, ye kiwaan yaambede winime. ⁷ Ye niindem aombed yiib kuu yumburum kaare kaine amnenib, yiib yaa komarewa kedmengkanduwene areb kuu yiib anam andi kuu aromnibka, yiib niindem aom kuu kube eso andiyiib muubne derendarok.

⁸ Kudi wedmime, yenambede okad kiri yi meendobi aombed meneboon ye wengiyiib dudi idiibban ye wengiyiib yaambede yiib ben ye dabderem yiri nongkobaib andid. Kuye weng kuu karub ye amowamowiib kingkin yi aningko kankooni ye amowamowiib yaambede menebimaan, Keresu yaambede ban.

⁹ Kedi, Yesu Keresu kuu God ye meeni koremiib inamen koremiib dowaken koremiib aromkono koremiib doreen, kwane okad yiri doboroon kwamunemo. ¹⁰ Kwane, Keresu yaambede ye meeni koremiib inamen koremiib dowaken koremiib aromkono koremiib kuu yiib yaa bangkandoon. Ye kuu aromkono maa maa korem awinidaniib korok maa maa koremiib yi korok kui. ¹¹⁻¹² Yiib anam andiwen yaambede Yesu bobnoon yirimbed nen demboon ye God ye aromkono yaa yiib kuu baptais keriwene kuu, Yesu yoom mangkene ye yoom ben dembemoon areb keriwene. Kwaniwen kumbed kad wanabemoon areb Yesu yaningko yaambede yiib id ye dowaken kuu wankoraron. Kuku karubbedban Keresumbed kwanoon.

¹³⁻¹⁴ Kwane, anukbed yiib ambarakmi kuyiib yiib id ye dowakenbed yiib oonoon kuyiib yaambede yiib kuu duknemoon areb doboriwene. Kuyaron kuu Godbed Keresu kwamune areb yiib

kuu ongmoone wadkeriwen. Godbed ambarakmi ye kakman kondi ye weng wongkooniib Moses yoom amob ongmooniiib kuu nub yaa manmo keroon. Kumban kuye weng kuu Godbed benwene at ming arimbed bakumbed kaare kinoon kumbed, nub ambarakmi korem kuu are nonondandoon. ¹⁵ Kwane, Godbed aromkono maa maa korem awinidaniib korok maa maa koremiib bongme yi aromkono kankorarekore, Yesu komo kmoon yaambéd nangbe burudandoon korokbi dowad yi kuu wedangkambéd ben yi aromkono dowan kii ande damangkanden yaron.

¹⁶ Kwana kowe, yiib komo ok o animan animaib o kurikurimbon o Sabat aron arimbed komo kamimaib kuye dowadbed yiib kwane korondaiwe karub yenambéd yiib benwene wengyundandaib. ¹⁷ Keyeman kee kuruwakmo, amaan ari kwane menebaneen andi ye kumunkingki yeman. Kumban anam anam yeman kuu Keresu yaambédmo. ¹⁸ Karub kane kuu yekareb kankubuni ye dudi inameniib engyus yaa kurikuri keriyiib yaa kube kamimaan kumbed, yiib kuu yiib trofi kandaib andi dowad yiib ben abdon wanandameen kuu kebenime. Kuye karub kuu komo wedmoon kuye dowad weng miin doboob kerengkan dakmimaan. Kwane, ye kuu Kingkin Karadmo ye kerekmen yaa dorokban kowe, yeka ye inamenbed inamen ogoodmo maa maa bangkande kerengkan kere doreen. ¹⁹ Ye kuu Korok Yesu yaa wini ye kiwaan kuu nonondandoon. Nub Korok kee ye id kuu nub kuristendan kui, ye yaambéd id kumundinmo

kuu ingkanabooniib mekmeediibbed koromone ingkananmo wonoon kuu, Godbed ye dowaken komarewa kere kainok ande meenimaankob kaine winimaan.

²⁰ Yiib kuu Keresu ibmo keriwenkob okad yiri dohiri ye amowamowiib yaa duknemoon areb keriwen kowe, komande okad yiridan areb kuye amowamob ye dabderem yiri dohirimaib? Amowamob kuu kei. ²¹ Kee awinaib, kee mokwaraib, kee dedmonaib, kui.

²² Keye amowamob awene kee ben awingkaniib kuu ma idiib keraanban, amborom kuu kuye amowamob kuu nimakarub yi kwanime ye wengiib nimakarub yi kedmengkandiyiib yaambbed demboon kowe. ²³ Kuye amowamob kuyaa wedmaniib kuu meeni kangdom areb ande meenaniib, yika yi inamenbed kurikuri amowiib yika dabderem yiri kankubuni ye dudi inameniib id yaa kamkonomo keru ye inameniib kowe. Kumban kuye amowamob kuu aromkonoyiibban kowe id ye dowaken yaa ma kebenindeban.

3

Karadmo Yaambbed Dobiri Ye Kerekmen

¹ Yiib kuu Keresu yoom ibmo ben demboondan kowe, inamen arimo awine kande doberembirime, Keresumbed God ye wiwi angkambbed dibeen ye inamen kui. ² Yiib meeni korem kuu bene kandunib inamen ari yaamo kiribenib meendobime, okad yiri ye inamen yaamban. ³ Amborom kuu yiib kuu kwane dukniwena yiib wadkeri kuu Yesu Keresu yaa daboknenib ibmo bikniwen, Godiib aom bikne angkeen kowe. ⁴ Yiib wadkeri anam

kuu Yesu Keresu kowe, aron kwane ye kuu mene angkadaraneen ari kuu yiid kwangkong ye yoom ibmo nambiriyiid angkadaraniib.

⁵ Kwana kowe, yiid id ye dowaken ye inamen korem kuu ben kirarundime, nenem kami ye inameniib anon dowomkim yaa doberemoon areb ye inameniib nenem kami ye moomiib meeni dowaken miin arewayiid yiribman yemoon bi ye inameniib kui. Yiribman yemoon bi ye inamen kuu God kankubune yiribman kankooni ye inamen. ⁶ Kuye inamen korem kuu meneboon kowe, God ye norin arewa wandi yaron kuu mananuun kii. ⁷ Kuye inamen korem kuu yiid kuu anak yiri awine kande dohiriwen, anam andindo yaron kui. ⁸ Kumban kibikee keye inamen awene kuu yiid niindem aom ben kirarundime, noriniib arud naawoniib inamen miin arewayiid wengamborokbanabiyiid weng komyengiib kui. ⁹ Kwane, yiid kuu neman dudanoon dudanoon kamaib, amborom kuu yiid kuu anak yiri dohiri ye kerekmeniib kuye kamiyiid yaa kuu koronde kirarundekorib, ¹⁰ dohiri yeweb awine kandiwen kowe. Kuye dohiri yeweb kuu kuye dohiri kiwaan ongmoon ye God areb kere ye yaa kaadkeri yeman. ¹¹ Kuye dohiri kerekmen yaambad andokbe yeka yekayiidban, Gurikdan kuu yika Yuudan kuu yika kuyiidban, kad wandiwendan o kad wandindandan kuyiidban, ambibkin maadan kuu dohiri arewa andi yemanban o ambibkin maadan kuu inamen miin arewa andi yemanban, yena yi daberem yiri dobere no deme awinembiridan o yika oone obonmo doriibdan kuyiidban kui. Kedi, Keresu kuu meeni darewoob arimbed, kwane ye

kuu ye karuwa nimaya korem yi niindem aom doreen.

¹² Kwana kowe, yiib kuu Godbed kingkane yeka ye dowad ben yuroondan, yiib kuu yembed mimyob dowaken darewoob keendoon kowe, mimyob keendiyiib awandiyiib yiibka kankubune yena kuu arimo andiyiib ingmiyi-ibban nangkemmo dobiriyiib yodbirimban emamombed meedme dobiriyiib kuu yiibka inware dobirime. ¹³ Kwane, yiibka kwamune awiniiwo nub kwangkon awinuuwo kaminok andime. Kwane, neman komo ambarakmewen korondaan kii ande nonondandoko neman komo ambarakmoon kwangkon kwane nonondandoko kamenabime. Yarimanbed yiib ambarakmi yaa kuu are nonondandoon kwamune areb kuu, yena yi ambarakmi yaa are nonondandime. ¹⁴ Kuye inamen amun awinibka ari kuu mimyob dowaken keendime. Kwananiib kumbed yiib kuu dabokne mimo anammo keraniib.

¹⁵ Kwane, korondiiwo Keresu ye yewenubmo kumbed yiib niindem aom dawuro oonendok, amborom kuu yiib kuu id mimo keruwen kowe yewenubmo dohiri dowad yiib yaa baande kinoon. Kwane, eso ande dobirime. ¹⁶ Meeni kangdom korem yaambbed neman kedmengkane ongkanoon kedmengkane ongkanoon kamibko, yiib niindem aom kubi dowakeniib kumbed God Ye Weng ye yookiib God yaningko kankooni yookiib kurikuri yookiib wingkanabime. Kwamibko, Keresu ye weng amun kumbed yiib niindem aom yiminmo muubnok. ¹⁷ Kwane, weng dakmi yaambbed o ambangki yaambbed,

komo komo awine kamandamiib korem kuu, Yariman Yesu yaambéd Ambe God yaa eso andenib Yesu yaningko yaambéd kwane ambangkime.

Kuristendan Yi Dobiri Kiwaan

¹⁸ Nima awadmiwenden, yiib kuu yiib karub yi dabderem aom dobirime, kukuu Yariman ye dowaken yaambéd inamen amunmo kowe.

¹⁹ Karub awadmiwenden, yiib kuu yiib nima yaa mimyob dowaken keendime, yi yaa kena karunga kamaib. ²⁰ Dana, yiib ena ambe yi weng korem wengambere awinime, amborom kuu kwamaniib kumbed Yariman kuu kubaneen kowe. ²¹ Awodkia, yiib kuu yiib dana yaa deekni weng daandaib, kwane daandaniib kuu yi kubi dowaken kuu biknaneen.

²² Yena yi dabderem yiri dobere no deme awinembiridan, yiib kuu okad yiri yiib kangkondan yi weng korem wengambere awinime. Korok yi indob ari kumbedmo amun ambangkubko nub yaa kerengkandime ande meenaib, inameniib ambangkiiyiib mimo keru ye inameniib Yariman yaa uniyiib kumbed yi deme awinime.

²³ Komo kamiib kuu yiib inamen koremiib kwane ambangkime. Nimakarub yi dowadban Yariman ye dowad ambangkemoon areb kwane ambangkime, ²⁴ amborom kuu yiib yiibkaad kwane ambangkaniib kuu Yarimanbed kakman kondaneen, Ewen ari yiib dowad kowi yeman. Kedi, Keresu kuu yiib Yariman keroone ye deme ambangkimaib kii. ²⁵ Kumban, karub kanembed ambarakmaneen kuu kuye dowad kakman kuu

Godbed konaneen, kedi, karub kane kuu yangko darewoowiib o embengiib kuu God kuu ma meenimokban kowe.

4

¹ Kangkodaan, yiib dabderem yiri dobere no deme awinembiridan yaa kuu yorokmo inameniib ibmo keru ye inameniib yaambad kamime, amborom kuu yiib yiibkaad yiib Kangkoman Ewen ari doreen kowe.

Ari Ongki Weng Yenayib Dakmoon

² Yiib kuu kurikuri keru ye inamen darewoob kere kwane kame doberembirime, kerekberenmo dobiriyiib eso andiyiib kii.

³ Kwane, nub dowad kwangkong kurikuriyiib kamendime, kwane Godbed ye weng amun ye dowad nub yaa kiwaan nandok. Ye weng amun kuu God ye inamen biknoon kuu Keresumbed korokboon ye weng kuu nubbed kan ari kedmengkandenmo yari yeman. Kuye dowadbed ne kuu nende sein nongbed yenbiwenkob dibiin.

⁴ God ye weng amun daandi kee kwanaked yimin kowe, yiib kuu kurikuri kamibko dianbonmo dakma.

⁵ Aron denekmen angkimboroka ma korondiyiibban kumbed yiibbed inamen kangdommo ye kerekmen yaambad bunangka doriibdan yaa kamime.

⁶ Yiib weng dakmi kuu korem kabamoon kondoon ye mimyob dowakeniib, amunmo karam ambod areb kerok. Kwananiib kuu nimakarub mimim korem yaa komarewa inandi yiibkaadkeraniib.

Yeenbon Weng

⁷ Taikaikusbed ne weng korem kuu yuib yaa kanmene dakmaneen kii. Ye kuu mimyob dowaken keenimaub ye kuristen angkodmi, ye kuu ma korondiyiibban God ye deme awini ye karub, ye yoom ibmo Yariman yaambad deme awinuwenman kui. ⁸ Ye kuu nenkowaana yuiwiib yaa ku monoon kui, menene nub yaa komarewa keroon ye weng dakmi dowadiiwa, angkon yuib niindem aom kuu aromne kubi dowakeniib kondi dowadiiwa, kumbedmo. ⁹ Ye kuu Onesimus yoom ku meniib kui. Onesimus kuu mimyob dowaken keenimaubman, ye kuu nub kuristen angkodmi ma korondiyiibbanman, ye kuu Koloseman, yuib mimo yuibkanmo kui. Yi ayoobbed keyaambad komo komo keroon ye weng korem kuu yuib yaa daandaniib kii.

¹⁰ Ibmo wii awunuwen ye karub maa yaningko Aristaakusbed kubendi weng yuib yaa keendoon. Baanabas ye mongkob Maak ye kwangkon kwane keendoon. Yuib kuu ye yaa komarewa awanenime ye weng kuu kandiwen kowe, yuiwiib yaa monoka kubenime. ¹¹ Yesu yaningko maa Yustus ye kwangkon kubendi weng yuib yaa keendoon. Keye karub ayoobmim kee Yuudan, God ye oonimbon ye deme awinimaubdan kumaom kuu, Yuudan yenayiibban. Anam kuu karub ayoobmim kee ne mimyob wandi kankubune kubi dowakeniib kawiwen kii.

¹² Epafras, ye kwangkon Koloseman, yuib mimo yuibkanmo, kwane ye kuu Yesu Keresu ye dememan, ye kuu kubendi weng yuib yaa keendoon. Ye kuu yuib dowad naawonmo kurikuri kamembirimaan, kingkin kerekmen

yaambed amnekorib ma karekmiyiibban kerekorib God ye inamen dowaken korem yaambed kangdommo doberembirime anded. ¹³ Nembed ye dowad weng anam ke dakme korokbaan kei, yiib dowad deme yobdood awinembirimaan, kwane Laodisea aom doriibdaniib Hierapolis aom doriibdaniib yi dowad kwangkon.

¹⁴ Nub mimyob dowaken keenimaubman dokta Luk yoom Demas yoombed kubendi weng yiib yaa keendiwen. ¹⁵ Ne kubendi weng kuu anam andiwendan Laodisea aom doriib yaa kondime. Kwane Nimfa yoom anam andiwendan yu ambiwoom nedbimaib yaa kwangkon kondime.

¹⁶ Kerek kee kandenib kanwene yiib kurikuri ambiwoombed kimingkaniib ye yondem kuu, anam andiwendan Laodisea aom doriib yaa kondime, yi kurikuri ambiwoombed kimingki dowad. Ne kerek yi yaa wongkaan kwangkon yi yaambed kanmene yiib kurikuri ambiwoombed kimingkime. ¹⁷ Aakipus yaa yedmenime, “Yarimanbed eb yaa deme kabdoona awine kandewen kuu awine downan kere, kuyaa korondaab.” andime.

¹⁸ Pool, neka ne dingkimbed kubendi weng kee wongkaan kii. Ne kuu nende sein nongbed yenbiwenkob dibiin kuu monkone meenime. God ye kabamoon kondoon ye mimyob dowaken kuu yiib yaa kerok.

**Genesis, Psalms, and The New Testament in the
Yongkom Language (also called the Yonggom
language) of Papua New Guinea**

Copyright ©

Language: Yongkom

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 11 Nov 2022 from source files dated 22 Nov 2019

b3f9b0a2-8cdb-5470-8e3c-8250231eee99